

# أصوات الضحايا

ما تعلمناه من المحادثات مع ضحايا العنف في السودان حول العدالة الانتقالية

**FRIEDRICH  
EBERT  
STIFTUNG**





## العمل الفني لغلاف الكتاب:

اللوحة بعنوان "الصرخة"؛ رُسمت بواسطة الفنان جلال رحمة في أبريل 2019 أثناء اعتصام الثورة السودانية امام مقر القيادة العامة للجيش بالخرطوم. احتلت اللوحة عدة أمتار مربعة في جدار أسفل نفق جامعة الخرطوم. وتمت ازلتها بعد احداث فض الاعتصام.

حقوق الصورة : ابوبكر جار النبي الناير

©Friedrich-Ebert-Stiftung Sudan Office 2022 (ARABIC)

All rights reserved. No part of this publication should be reproduced without written permission from the publisher except for brief quotations in books or critical reviews. For information and permission, write to Friedrich-Ebert-Stiftung Sudan Office.

Friedrich-Ebert-Stiftung, Sudan Office  
18th St. off Baladia St.  
P.O.B. 3668  
Khartoum 11111



# قائمة المحتوى

- ١ المقدمة
- ٤ السؤال الأول  
هل عفى الله عما سلف ؟
- ١٢ السؤال الثاني  
هل لديكم ثقة في المؤسسات العدليّة ؟
- ١٨ السؤال الثالث  
افراد القوات الامنية وضباط الصف والجنود، هل يعتبروا ضحايا  
ومنفذين فقط للأوامر ؟ والمسؤولية الكبيرة تقع على عاتق الضباط  
المخطئين لهذا الأمر ؟ مع او ضد ؟

٢٦

### السؤال الرابع

هل انتم مع لجنة "نبيل اديب" ام لجنة افريقيّة او دوليّة ؟

٣٤

### السؤال الخامس

إذا ما تم اعتراف واعتذار علني من قبل القوات النظاميّة لما ارتكبه من جرائم فهل تتم المسامحة او العفو ؟

٤٠

### السؤال السادس

موقفكم تجاه العويضات الماديّة وما يُعرف بالديّة ؟

# المقدمة

”نحن نريد العدالة“. كان هذا هو الشعور العام الذي تشاركنا فيه على مر السنين عندما التقينا بالناجين من الغزاة في جميع أنحاء السودان - سكان دارفور والنيل الأزرق وجنوب كردفان وشرق السودان وغيرهم. لقد تركت عقود من الصراع وإساءة استخدام السلطة تراكمات جمة من الصدمات ومشاعر الظلم. ويطلب العديد من المتضررين معالجة مظلهم، لكن العديد منهم يفتقرون أيضًا إلى المعرفة والأدوات والمساحات التي تناقش تحقيق العدالة. يشعر الضحايا بالإهمال والعجز. تسعى حملة انصاف للعدالة الانتقالية إلى تلبية بعض الاحتياجات من خلال تثقيف أسر الضحايا والناجين حول حقوقهم، أو سبل الدفاع عن قضاياهم، أو كيفية تشكيل تحالفات. ”العدالة والسلام والحرية“ التي كانت شعارات الثورة السودانية. وتبين مشاوراتنا أن السودانيين ما زالوا يتطلعون إلى تحقيق هذه الأهداف، وفي السودان ما بعد البشير، يدعو مجتمع متنوع إلى عملية التعافي والمصالحة. يجب أن تكون العدالة والحقيقة والانصاف أساس مستقبل سلمي للسودان.

ظهرت فكرة هذا الكتيب في صيف ٢٠٢١، بعد ورش عمل نظمتها حملة انصاف بالتعاون مع مؤسسة فريدريش إيبيرت في الخرطوم لأسر ضحايا النزاع. دعت حملة انصاف حوالي ٨٠ شخصًا، كان معظمهم من عائلات الأشخاص الذين اختفوا خلال نظام البشير أو الشباب الذين قتلوا في الجرائم الوحشية التي طالت المتظاهرين في ٣ يونيو ٢٠١٩. اجتمع الآباء والأمهات والأخوات والإخوة والبنات والأبناء وأصدقاء الشهداء معًا، وتشاركوا مظلهم التي لم تتم مخاطبتها. وأتاحت ورش العمل حيزاً لمناقشة الركائز الأساسية لتحقيق العدالة الانتقالية، ومبادئ عمل نظام العدالة، استخدام العفو العام، جبر الضرر، التعويضات، ونماذج البحث عن الحقيقة، إلى جانب جلسات حلقات العمل، أجرى فريق انصاف مقابلات مع المشاركين والمشاركات بشأن تفكيرهم في العدالة من منظور تجاربهم الشخصية.

وقد صمم محامو العون القانوني أسئلة تركز على سبل الانصاف القضائي. واستكشفوا مدى ثقة المشاركين والمشاركين في الأجهزة القضائية؛ ومدى استعدادهم لقبول التعويض (وأي نوع من التعويضات؟)، وتصورات مسؤولية الجناة، وكذلك المقترحات المتعلقة بالإصلاحات المؤسسية. نحن نرى هذا الكتيب كبدائية، اذ يجب طرح المزيد من الأسئلة واستمرار الحوار مع مجتمعات الضحايا المختلفة مع الجناة. نحن بحاجة إلى مزيد من الاستكشاف عن تفكير الضحايا حول لجان الحقيقة، إحياء الذكرى، عمليات التدقيق، واحتياجات الإصلاح. ومع ذلك، كانت الإجابات على هذه الأسئلة الأولية مفيدة للغاية لدرجة أنها قادت مؤسسة فريدريش إبيرت إلى تجميعها في هذا الكتيب وجعلها متاحة لجمهور أوسع، وبالتالي إعلاء صوت هؤلاء؛ بعد عقود من الانتهاكات.

ويهدف هذا الكتيب في المقام الأول إلى تكثيف الحوار حول الأدوات والاستراتيجيات التي تعالج الأخطاء التي حدثت خلال السنوات الماضية في السودان مع احتلال وجهات نظر ورغبات الضحايا المتنوعة للصدارة. قد يجد الجمهور السوداني الأوسع والمجتمع الدولي هذا الكتيب مفيدًا، للتعرف أو الاستماع لأصوات السودانيات والسودانيين الذين عانوا من خسائر فادحة، وربما يساعدون في ذلك العمل المشترك على تحقيق المصالحة المجتمعية. أخيرًا، نأمل أن يكون هذا الجهد مفيدًا للأشخاص الذين يقومون بتطوير أو تمويل أو تنفيذ عمليات الإصلاح القضائي في السودان، وتعزيز توصياتهم في عملية العدالة الانتقالية التي لم يتم التأسيس لها بعد في السودان.

**رفعت مكاوي - إنصاف للعدالة الانتقالية**  
**كريستين فيليس - مؤسسة فريدريش إبيرت**



---

هل عفى الله  
عَمَّا سلف؟

---

انا ضد الكلام دا؛ لان يمكن المسألة مسألة حقوق،  
فا انا بشوف ان الناس اساسا الكانو متضررين  
من النظام السابق بالذات أسر الشهداء والناس  
الانتظلموا من البداية المصابين والمفقودين دليل  
كلهم عندهم حقوق قانونية مفروض ياخذوها.

أسرة الشهيد ع. م. ع

**السلام اسم من اسماء الله الحسنى، والسلام  
احد شعارات الثورة الثلاثة فا نحنا كبعنا ما  
بنتعرض على السلام؛ لكن برضو ما بنتجاهل  
العدالة لو اصلا في عدالة حيكون في سلام.**

والرة الشهيد م. ا

"عفى الله عن ما سلف" هي سبب الجريمة لان  
لو من عنبر جودة سنة ٥٨ ما السودانيين اتبعوا  
"عفى الله ما سلف"، ما كان تكررت في مايو ما  
كان شفناها في الانقاذ ببشاعتها من ٢٨ رمضان  
حتى اليوم.

أسرة الشهيد م. ع

المسامحة دي ما حاجة ساهلة. انا ما عندي  
ضمانات ان حتى لو انت اسبي جيت قلت لي ياخي  
سافي التراب وانا معترف، مافي ضمان، بكر  
ممکن سلطة تانية تقول نفس الكلام وهكذا.

أسرة الشهيد م. ع

كان في أسر بعض منهم ادوهم دعم يعني عفوا،  
نحن ما حنعفي له؛ لأنه الحاجة دي نحن كأسر من  
٨٥ إذا كنا بنقول عايزين القصاص ما عايزين العفو  
ما كان حصل الحصل في السنين المصت دي؛ يعني  
العفو دا عن جرائم خفيفة شوية، لكن جرائم ضد  
الإنسانية جرائم بتاعت تعذيب، بتاعت إعتقالات،  
تقول لي اعفي؟! **اعفي له واعفي لمنو؟  
إذا الرئيس هو العمل الحاجة دي اعفي  
للرئيس؟** حيجي رئيس زيه ويعمل نفس العمائل.

افت الشهيد ع. ي

لازم نعرف الحقيقة يعني منو القاتل؟ وعمل كدا  
لشنو؟ عشان الجيل البعدنا لما يجي الخطأ ثاني ما  
يتكرر. فا لازم نعرف الحقيقة كاملة، انا غايتو في  
رأبي ما بقبل العفو نهائي.

افت الشهيد ف. ع. ف

لن اتخاذ ولن اتنازل ولن اعفو ولم اصفح عن حقي؛ لأن الحق حق مبادئ، وربنا سبحانه وتعالى احل القصاص فإذا القاتل يعني بفتكر ان انا يوم من الايام اتنازل ولا بمال الدنيا، رغم وضعي المادي إذا جابوا شفتي مال قارون قالو لي تتنازلي لا.

**في حاجات انت ما بتقدر تنساها لكن ممكن تقدر تغييرها للاحسن , يعني غير انك تنساها تتعلم منها , ما ممكن تتناسى تاريخ بالحجم دا . فا كل ما تتعلم منها و تستفيد منها وتحول طاقتها لطاقه ثانية تستفيد منها اكثر بكون احسن.**

تحقيق العدالة القصاص. ودي اهم مطالب حاليا بالذات في قضايا الثورة ما زي كل القضايا. نحن قضايا الشهداء بالذات، العفو ما بنفع؛ ليه لانه بتحاول قدر الامكان تصل لمرحلة ان الدم ما يتكرر ثاني او الشيء الحصل ما يتكرر ثاني عشان كدا لابد من القصاص.

بالنسبة لرأيي، العدالة لازم تجري مجراها، كون نقوم نسامح ونتصافا خلاص نقول عفى الله عما سلف اقنع الناس بالحقيقة وين القاتل؟ وين المجرم؟

أسرة الشهيد م. س

**- دا ولدي الكبير وهو كان واقف ماشاءالله كان بساعدني كتير.** كون ان الناس ديل نحن نخليهم ونعافيهم أنا دي شخصيا ما بقدر اعافي . - ما بنقدر نعافيهم، زي ما قالت الدم قصاد الدم ما بنقبل الدية. صح صعب شوية ان نقدر نعافيهم ونخليهم.

أسرة الشهيد م. ح

يعني الدعم السريع، الشرطة، الأمن، إذا جوا في التلفزيون للإعلام واعترفوا دا بجبر الخاطر شوية، لكن نحن ما حا نغفوا عنهم خالص ليه؛ لأنه انا باعتبار الناس ديل مفروض اتحاسبو، اعترفوا دا دل ليهم ايوة، ضروري هم يعتذروا، لكن كونه نعفي عنهم مستحيل. انا والدة الشهيد شخصيا ما حاغفى عن اي زول ارتكب جريمة في حق الشعب السوداني، مفروض اتحاسب، يعني دي العدالة الانتقالية الإحنا ساعينها.

والدة الشهيد ا. ع

انا الليلة لو زول جا ضربني وجا اعترف بجرمه، ان انا غلطان ممكن اسامحه. لكن لما زول هو يقوم يضربني وما يعترف بحقيقة انه ضربني او كدا ما ممكن اسامحه، فا كيب هم ناس قتلوا اولادنا، خليهم يجيبوا الناس القتلة بعد كدا بس ممكن اعفوا (فمن عفى واصلح فاجره على الله).

أسرة الشهيد م. ا

انا رأيي اصلاً حا اعفاه، بعفاه ما بفرق معاي والله بشيء؛ لو قتلوه هو زاته، ما برد لي ولدي.

والد الشهيد م. ع. ا

دا كلام ما وارد لأن المصالحة مع منو؟ مع الدولة القاتلة؟! تبقى ما وارد على الاطلاق. فا يظل المطلب بتاع القصاص في تثبيت الجرم على ممارسة الدولة لهذا القتل الممنهج وهذه الجريمة خاصة و استقلالية الدولة في قضائها او نيابتها وتنحي هذه السلطة عن الوضع اللي هي فيه.

والد الشهيد ا. ك

لو جوا وقالو كدا مثلاً، بنعافي العفو عند الله.

زوجة الشهيد ع. م. ع

عشان نحن ننسى الفات تحصل مصالحة نعم، عفى الله عما سلف لا؛ لازم يكون في قيمة يتم دفعها عشان يكون في عفى الله عما سلف إذا ما ساهم العفو في تغيير السودان يكون ما عنده قيمة؛

**لازم يكون عفو مشروط بحقوق تظهر في القانون السوداني.**

والد الشهيد ع. س

إصلاح المؤسسات بالسودان هو المطلب الأول والأخير، المطالبة بالقصاص من الذين نفذوا هذه القضية هو مطلب. لكن ربنا سبحانه وتعالى ادانا فيه الحرية (ومن عفى واصلح فاجره على الله) ونحن ما بنقول نحن بنعفي، العفو انا قلت بجي في حالة واحدة الا وهو إصلاح المؤسسات العامة، إصلاح البنية التحتية في السودان، دي كذا بتحسبنا نحن الحاجة الكان بنادوا بها الشهداء او طلوعوا من اجلها اتحققت.

أسرة الشهيد م. ص

بالنسبة لاستشهادها، قتلها كان غدر وظلم لانها اتقتلت برصاصة جاتها داخل المنزل **لا مشت مظاهرات** **لا عندها لون سياسي. انا بكالب بالقصاص.**

افت الشهيدة ف. ج

انا عن نفسي ما حا اسامح لأسباب كثيرة؛ انت القتلته دا زول كان ماشي يدافع أول شي عن حقك انت قبل حقه هو دا مثلا إيام المواكب لحدي الاعتصام، لما جا فض الاعتصام انت ما قتلت بس انت قتلت، حرقت، اغتصبت، رميت في النيل! يعني انت قتلته داير به شنو؟ خلي اهله يلقوه يعني نحن حتى الان عندنا اكر من الف فقيدا اهلهم حتى الان على امل ان يجوا راجعين واحتمال اكون جدعوهم في النيل فا دي حاجة انا شخصيا ما بقدر اغفرها يعني.

أسرة الشهيد ع. ع

انا ضد الموضوع بتاع "عفى الله عما سلف" لان اهم حاجة بالنسبة لي المحاسبة، اتحاسبوا الناس الارتكبوا الجرائم دليل عشان انا اضمن ان مافي زول لقدام يعمل كذا.

افت الشهيد ص. ع. ا

انا الكلام دا انا معاه - ضده؛ طبعا العفو مطلق كذا بدون شروط وبدون قيد ضده تماما، يعني يفترض إذا كان في مصلحة لايد من تكون في شروط، مش شروط شخصية، يعني تكون وكنية بحتة

والله الشهيد ع. ب

العفو له شروط فا انت لايمكن ان تعفو ليك انسان اصلا هو قاتل، ولم تعلم من الذي قتل فا كيف تعفي؟ فمسألة عفو هنا / رغم ان الجريمة قد يجوز ان الواحد يقول جريمة جماعية، فا المسؤول الأول والأخير هو رئاسة الدولة طبعا. يعني كان رئاسة الدولة بنفسه هو جا واقر واعترف بانه ارتكبنا جريمة بحق الشعب السوداني، يمكن لنا ان نعفو.

أسرة الشهيد ع. ا

**الخيار الأول بإصلاح المؤسسات؛ ما حتكون في ثاني اي قضايا من النوع ده، والثاني العفو، لكن العفو يعني هو ما حاجة ساهلة إنك تعفي.**

أسرة الشهيد ن. س

اغ الشهيد م. ا

انا ضد اي دعوة للتصالح مع الجهات التي ارتكبت من الفظائع والجرائم وانتهاكات حقوق الانسانية بصورة سافرة ودثية مما يستدعي محاسبتهم امام محكمة الجنيات الدولية "لاهائي" لو كان تمت محاسبة اصحاب جريمة عنبر جودة في الخمسينات من القرن الماضي لما كان تمت مجزرة فضي الاعتصام في بدايات القرن الواحد والعشرين

والله الشهيد ع.. ك

حقيقة مبدأ العفو والتسامح عند الشعب السوداني موجود اصلاً؛ ولكن بسبب العفو والمسامحة والمصالحة المجتمعية بعض الأشياء هي معروفة عندنا ، بمعنى؛ ان تعرف الجاني منو، ومن ثم إعتذاره، ومن ثم تقبل الناس لبعض الأسباب وغيره. انا اعتقد الناس ممكن يصلوا لمسألة التسامح والعفو، لكن انا ما بعرف الزول القتل ولدي اسامح منو يعني؟ انا اعتقد دي حاجة مهمة جداً.

والد الشهير ع. ا. ا.



---

**هل لديكم ثقة في  
المؤسسات العدلية؟**

---

زي ما بقولوا الشر يعم والخير يخص، يعني ممكن  
اكون في مؤسسة القضاء ٩٠ في المية ناس يمكن  
ما يحققوا لينا العدالة وهم المسيطرين اصلاً، لكن  
يمكن العشرة في المية قادرين لكن ما قادرين  
يعملوا؛ يعني صوتهم ما مسموع لان الزول  
الحاكم هو الاصلاً بفرض سلطته وبمشي الأمور.

اغ الشهيد ع. ا. ا.

لا اثق في النيابة ولا القضاء؛ مافي عدالة، مافي  
نزاهة، يعني عارفين المجرم وما قادرين يجيبوه  
للعدالة عشان يُقتص له الحكم.

أسرة الشهيد م. س

والله بثق في القضاء والنيابة في السودان هنا.  
لكن ممكن تكون ثقة جزئية بمعنى ان في قضايا  
معينة ممكن ينصفوني فيها وفي قضايا ثانية ما  
يكون في اي انصاف .

أسرة الشهيد ص. ط

القضاء السوداني لو اصلاً فيه عدالة؛ الثلاثة سنين  
من موت اولادنا كان شغنا في قضية واحدة ان  
شاءالله اتحكمت. انا بشوف ان مافي عدالة والله.

والدة الشهيد م. ا

انا اثق في القضاء والنيابة السودانية، لكن يعني  
حتى لو في شواذ بكون واحد اتنين يعني ما كل  
القضاة وما كل النوابات. وهسي الناس يعني ماشة  
يمكن في اغلبية الملفات القانونية مع النوابات، فا  
بتلقى مساعدات لكن برضو يعني الناس محتاجة  
لإنها تكون المجلس التشريعي، وحتى القضايا  
القانونية في النوابات ماشة إمك باسلوب بكيئة  
شوية، الناس بكالبوا بأن القضايا تمشي بصورة  
أسرع عشان اي زول يعني عنده حق ياخذ  
حقوقه بعداك يعني على الاقل لمصلحة البلد.

اغ الشهيد ع. م. ع

ما بثق في النيابة والقضاء السوداني لأنه ما  
شايفين اي شيء. ما قدموا لينا حاجة واضحة كدا.

أسرة الشهيد م. ا. ف

ما في اي قضاء في السودان؛ لان قبل كذا في جرائم حصلت وحكموا على الناس بالإعدام زي القضية بتاعت الأستاذ أحمد الخير لحدي ما حكمت المحكمة، وقضاة حكموا بالإعدام شنقا حتى الموت ما اعدموا ولا واحد فيهم.

افت الشهيدة ف. ع. م

يعتبر القضاء السوداني من اكفاً وانزه وأفضل القضاة على مستوى أفريقيا وبعض الدول العالمية الأخرى، ولكن في فترة -الإنقاذ- تم تسييس القضاء بشكل كبير جداً مما جعل كثير يحيد عن الطريق وعن تحقيق العدل، ولكن إذا عاد القضاء لسيرته الأولى انا اعتقد أفضل من القضاء السوداني ما موجود.

والد الشهيد ع. ا. ا

كنا واثقين في القضاء السوداني؛ لانه كان في فترة ما قضاء مستقل، لكن الفترة الغات فقدنا الثقة فيه لأنهم ما شغالين، ما اتحققت عدالة، ما اتحققت محاسبة و لحد الان ما في اي شيء حصل بالنسبة للعدالة.

والدة الشهيد ا. ع. ا

القضايا الوصلت المحاكم لحدي الان ما فيها اي تحرك وما شايفين اصلاً في النية ان الناس تعمل .

أسرة الشهيد ع. ن

والله الى حدا ما النيابة بالنسبة لتجربتنا نحن مع قضية الشهيد م. خشينا فيها مرحلتين يعني، كان في وكيل نيابة ما كنا واثقين فيه تماما، تم تغيير وكيل النيابة بعداك بقينا واثقين فوقه، القضاء السوداني بنثق فوقه.

اخ الشهيد م. ع. ا.

نحن بنثق أول شي في القانون السوداني عشان يحقق لينا مطالبنا ويحقق لينا القصاص بتاع شهدائنا، لان نحن ما بنثق في القضاء الخارجي ولا حاجة زي دي، احنا كان ما وثقنا في القانون السوداني، ما وثقنا في قانون بلدنا البلد حا تتطور متين؟ حتتصلح متين؟ عشان كذا نحن رأينا كأسرة الشهيد ح. ي لسه عندنا أمل في قضائنا السوداني.

اغت الشهيد ح. ي

يمكن قضية ولدي تكون سبب في ان انا ما اثق فيهم لان انا كنت بمشي يوميا من الصباح بنرجع الساعة ٣ مع اصحاب الشهيد فا بنمشي بقولوا لينا وكيل النيابة عنده كدا، بعد نص ساعة، بعد ساعة، لحدي ما نرجع ما بنقابلوا، **لحدي الان نحن شهادتنا ما قدمناها فا يبقى كيف يكون في ثقة؟**

والدة الشهيد ص.

انا صراحة بثق في القضاء السوداني في زمن من الزمانات، بعد ما حصل الحصل والكل صار مضغوط عليه فقدت الثقة تماما؛ لانه بقت قصة بتاعت أوامر لحماية ناس ارتكبوا جريمة بشعة يعلم بها العالم كله.

الشهيد ا. م

انا كامل ثقتي في القضاء السوداني وكذلك النيابة العامة و لسبب بسيط بعض من وكلاء النيابة ممثلين في الحراك كان حاصل ضد الحكومة السابقة؛ فأنا بنثق في القضاء واثق في النيابة العامة.

أسرة الشهيد م. ت

بفتكر ان هي دايمًا اقرب للسلطة وفيها تسييس كثير وما مكان  
محاييد للعدالة. **والد الشهيد ع.س.**

**والله ياخ النيابة انا بعترها والقانون السوداني  
منبطحين وهبوط ناعم بالنسبة للدولة لان  
هم ما يعني ثقافة القانون زاتو والتعامل ما  
عندهم عندهم حاجة اسمها القوي ياكل  
الضعيف يعني شريعة الغابة فقط ما اكثر  
من كده فنحن ما عندنا ليهم حاجة اصلا.  
**والد الشهيد ع.م.ن****



---

**افراد القوات الامنية وضباط الصف  
والجنود، هل يعتبروا ضحايا ومنفذين فقط  
للوامر؟ والمسؤولية الكبيرة تقع على  
عاتق الضباط المخططين لهذا الأمر؟  
مع او ضد؟**

---

انا شخصيا الكلام دا مؤمن به تماماً مش صاح ولا ما صاح، مؤمن به تماماً؛ لأنهم لا حيلة لهم يعني هم اصلا ناس مأمورين بتنفيذ الأوامر.

والد الشهيد ع. ب

كسبعا المسؤولة مسؤولية القيادات، هم المفروض يتحاسبوا بس دا ما بعفي الافراد النفذوا الأوامر، ما يعفيهم من الجريمة.

افت الشهيد ص. ع. ا

والله انا ضد الكلام ، المسؤولية جماعية ما مسؤولية فردية مسؤولية جماعية، وهي من الرتب الأمرت ان الصغار ديل يعملوا كدا لو هي منعت؛ هم ما كانوا كبقوا الحصل في الشارع دا.

زوجة الشهيد ا. م

الأتنين في النار سوا يعني ما ممكن احاكم دا واخلي دا، الأتنين نفذوا الجريمة دي، فا الكبار والصغار الأتنين سوا في الموضوع دا .

صديق الشهيد ص. ط

انا ما داير الجندي القتل ولدي انا داير القائد الأصدر التعليمات؛ اصدها ليه؟ وعشان شنو؟ اعرف السبب دا بس، اصدر تعليماته بقتل الابرياء

ديل والاضفال ديل ليه؟ **إذا طُبق في اولاده**

**في بيته موقفه حيكون شنو؟ بس بسأله**

**السؤال دا. اجيب لي ولده اقطع اصبعه**

**السبابة اشوفه كيف بقبله خلي القتل.**

والد الشهيد م. ع.

ما ببرر القتل بأي حال من الأحوال مهما كان رتبتك صغيرة ممكن تخالف حتى لو جزأها الإعدام، انا عارفة في المحاكم العسكرية إن البخالف، عقوبته الإعدام ما فيها شك يعني، لكن الروح بيد الخالق ربنا سبحانه وتعالى، فا إنك انت تُقدم على القتل مع سبق الإصرار والترصد بالنسبة لي انا ما مقبول لكن انا شايفة إنهم قد تجبرهم ظروف في إنهم يختاروا الطريق دا او يختاروا العمل دا. ما بدينهم هم بشكل مباشر بنفس القدر البدين به من يصدر الأوامر.

والدة الشهيد ن. ع

حكم يبدأ من الأول، زول أمر بالأمر دا يحاكم، عقابه نفس الزول النفذ، كلهم  
مشاركين ما عندك حق تقتل زول اصلا. جاك أمر تقتل زول أنت نفذت تُحاسب  
أنت والزول القال ليك اضرب.  
اخ الشهيد م.ع

هو ديلاك المسؤولين، لكن المسؤولية الكبيرة بتقع اصلا في الحرك الصغير،  
دي مسؤولية الاتنين،

**بقولوا.. إذا كان المتكلم مجنون فالمستمع عاقل،  
حتى كان انا اديتك أمر تقتل انت تقتل؟! ما منطقي!**

صديق الشهيد ص. ط

في أنفسهم رفضو تنفيذ هذه الأوامر، وقفوا مع الثوار ورفضوا تنفيذ هذه الأوامر، انت كإبن للسودان وديل اخوانك وضماكم وكن واحد، وبلد واحد، وإذا كانت الأهداف موحدة، انا لو في محلهمم برفض حتى تنفيذ هذا القرار، فا نحن بنحمل المسؤولية للمكون العسكري والمكون المدني، كلهم هم كانوا مشاركين في عملية فض الاعتصام وهي مسئوليتهم.

والدة الشهيد م. ص

يعاقبوا الناس الكبار المسؤولين هم يتعاقبوا؛ لان الصغار ديل بأمرهم بس. مأمور بيأمره بينفذ.

اخت الشهيد م. ا. ف

ارى محاسبة كل من شارك سواء كانت رتب صغيرة او متوسطة او قيادية؛ ليه؟ لان الإنسان اصلا في النهاية محاسب داخليا، فا أنا لو واحد جا قال لي مثلا اقع البحر وانا زول عندي عقلي وعندي استيعابي ما حا أنفذ، بالتالي الرتب الصغيرة ما ضحية هم مشاركين في الأمر، كذلك القيادات العليا.

اسرة الشهيد م. ت

دايما السلطة بتكون العليا والقادة هم المسؤولين لكن بعد دا حسب الموقف، انا لما اكون بواجه عدو معليش انا معاك كدا ممكن الزول الأصغر دا انا ما بسأله، لكن لما يبقى موضوع بتاع ثورة انا عايز اغير ما عايز اغير عشاني انا الزول الثائر، عشانك انت برضو العسكري او رجل الشركة او رجل القانون.

اغ الشهيد م. ع

مافي زول شال سلاح و ضرب هو مسكين، معهما يكون، انت ممكن تخالف الأوامر، انت عسكري ادوك أوامر، و شاييف الأوامر دي صاح ولا غلظ ربنا اداك عقل تميز، **كيب الزول الانت قتلته دا زول اعزل ما شال سلاح ولا قاومك، انت تقتله ليه؟ حتى لو ادوك أمر.** انت مجرم والزول الكبير منك مجرم وكلكم مجرمين ومافي فيكم حد مسكين.

خال الشهيد م. ف. م

والله في النهاية دا برجع ليهم، هم عارفين دا غلظ ولا صح، والجهة دي كان ما ادت الأوامر ما كانوا نفذوها.

والدة الشهيدة ه. ه

... لأن أول حاجة الناس النفذت ما ناس جاهلة او صغيرة في السن، اكيد الزول النفذ دا ما جاهل، هو زول تابع لمؤسسة عسكرية يبقى اساسا في قوانين بتحكمه وفي لوائح زي ما انت بچيك الامر بالتنفيذ، بتنفيذ بحكم القانون انت زاتك. القانون هو زاته جوا كافل ليك انك انت تمتنع عن التنفيذ، بعدين دي روح ودا انسان و دا ما بديك الحق، انا ما بعبرهم انهم هم مظلومين او ضحايا انا بعبر دا جهل بالقوانين وبال حقوق.

اغ الشهيد و.ع.ر

هم ضحايا، والمسؤولين في الامر الرتب الكبيرة. لو الجندي جاني وقال لي يا حاج انا الاطلقت النار على ولدك ا. بسأله سؤالين انت غيبنتك مع ا. شنو؟ الخلفية بتاعت تار قديم بينك وبينه في شنو يعني؟ في طين؟ في دم؟ في حاجة بيناتكم؟ عشان تستعمل بندقية الدولة اللي هي حقتنا نحنا زاتنا وذخيرتنا تقوم تضرب بها ا. ليه؟ اكيد حياويني بالنفي؛ ان ما عندي غيبنة سابقة معاه عندي اذن، بستصحيه كوالي بإعتبار انك انت يا سيد بدل ما عايز تكون المجرم تمشي تبقى شاهد تأتي النيابة تبلغ عن الجهة الادتك الامر؛ لأن انا الجهة الادت الامر دي هي المستهدفة عندي، بإعتبار هي المجرم وهي جهزت كل العوامل اللوجستية لهذه المجزرة فالجندي ضحية.

والر الشهيد ا.ك

**الوامر اللي اخدوها، الناس اللي قتلوا باسم الجيش او الشركة او القوات النظامية عموما ممكن جدا ولدي كان يكون واحد منهم لو تربيته مختلفة كان ممكن جدا يكون ضابط وهو نفسه يتلقى اوامر ويقوم يؤدي العمل دا، لانه بفتكر ان دي مهنته البياخد من وراها عيش يبقى نحن ما نفكر في ديل، نحن نفكر في القوانين الخلت ديل يتربوا على النظام دا واتربوا على كذا؛ بدل ما هم يكونوا حاميين للمواظن وحاميين لحرية المواظن يكونوا شغالين مع الحكومات البتجي.**

والدة الشهيد ع..س

يعني كونهم يعملوا كذا دا ما مبرر انهم عشان  
سمعوا كلام الرتب الكبيرة يعني.

### افت الشهيرة ا.ع

والله الافراد اشد شراً من الضباك الكبار؛ لان  
الضباك دا هو امرك زي ما الشيطان بوسوس  
ليد اعلم الخطأ الكدا هو بس اداك الفكرة لكن ما  
بجيرك، لكن انت هنا كجندي او فرد تابع لمؤسسة  
معينة انت بتراجع لنهجك و قمت على شنو. طاعة  
الله في طاعة الوالدين يعني اول حاجة والدينك،  
لو امروك في حاجة تعصي اوامر الله ما بتعملها،  
خليك من كونك انت تعصي اوامر الله في طاعة  
ضابك ولا كذا؟!.

### اغ الشهيرة ع.ا.ا

**يتحاكم الأمر مش المأمور؛** دا بنفذ بس، إذا  
كان ما نفذ عنده اطفال مساكين وعنده ام، ابوه،  
اخوانه وعائلة منتظراه، اكردوه من الشغل او ودوه  
الشارع، اعمل شنو يعني اسرق عشان يعيشوا ؟  
طبعا لا فا انا بقول يتحاكم الأمر قبل المامور.

### افت الشهيرة ف.ع.م

انا اعتقد ان حتى ولو هناك اوامر من قادة، من  
حق صغار الضباك والاجهزة الامنية انهم من  
حقهم ما ينفذوا هذه الاوامر او حتى التنفيذ  
ممكن يبقى بطرق اخرى يعني بدل "shoot"  
"to kill" زي ما قال علي عثمان، ممكن كان  
اضر به اعطله ممكن وممكن اشياء كثيرة لكن  
طالما انت اصريت انك تضرب هؤلاء الشباب  
في مقتل يعني انت قاصد القتل اعتقد ان  
انت جزء من المكون اللي قام بهذه المسألة.

### والد الشهيرة ع.ا.ا

الناس الدبروا و الامروا والنفذوا القتل مفروض  
يتحاسبوا عشان تتحقق لي العدالة الانتقالية انا.  
بتعني لي العدالة الانتقالية محاسبة الرؤوس  
الكبيرة.

### والدة الشهيرة ا.ع.ن

الافراد في الجيش في الامن والعمليات، في الدعم السريع حسب مفهومي عن الضحايا، انا نفسي يعتبرهم هم ضحايا، بسقط اهمية محاكمتهم **لكن بطلب إعادة تأهيلهم من خلال مؤسسة محترمة وتغيير عقليتهم العسكرية.** بالنسبة للقيادات البتصدر الاوامر دي قيادات يجب انها تتحمل مسؤولية الاوامر الاصدرتها لقواتها بالقتل لانهم هم يقدموا الدعم والحصانات و البكسروا رقبة القانون فا ديل اولاً حتى إذا كان في عفو ليهم مفروض يتم تحديد ادوارهم في المستقبل في العمل السياسي؛ ما يكون عندهم دور خالص في العمل السياسي في السودان.

والد الشهيد ع. ا. س



---

**هل انتم مع لجنة "نبيل اديب"  
ام لجنة افريقية او دولية ؟**

---

لجنة نبيل اديب منذ تكوينها انا قلت رايبى فيها، وقلت ان هذه اللجنة ستمدد الآجال الزمنية وحا تمشي بالآجال الزمنية كل مرة وهذا ما حدث وبالرغم من ان نبيل اديب يعني هو ببرر بان نحنا دايرين نقدم قضية لا تُشطب من القضاء، انا بفتكر ان الفترة كانت كافية، عدد الشهود القابلهم، قابل اكثر من ٣ الف شاهد كل الشواهد، من المفترض ان هو بعد دا يقدم حاجاته للمحكمة  
والر الشهير ع. ف

اول حاجة لجنة نبيل اديب ما حتجيب شي ولا حتحقق شي، بمشي فيها مع راى الناس؛ كلها بتقول الكلام دا، وهو حقيقي. الحاجة الثانية ان كونه نستعين بلجنة افريقية، بالنسبة لي مرفوضة؛ لان اللجان الافريقية هي بنفس المستوى بتاع انظمتنا هنا في السودان.  
اغ الشهير و. ع. ا

كونه نحنا نجيب ناس اجانب لا، حتى لو لجنة اديب ما عملت حاجة، نشكل لجنة مننا وفينا كسودانيين، نحنا مع بعضنا مشكلتنا لو ما حليناها مافي زول بحل لينا مشكلتنا، ما ممكن انا مشكلة بيتي اوديها لجاري يحلها لي، ذي صعبة علي. برضو الأمل فيها بنتمنا تجتهد، ما تتجاهل القضايا يعني تحاول بقدر الإمكان تعمل المباحثات و تشوف الناس العملوا الجرائم حتى لو جابوا جزء من العدالة، جزء من الناس العملوا الجرائم ذي نحن شوية بنرتاح لما يقولوا فلان الزول القتل فلان اتقبض احنا بنحس بان في عدالة.

اغ الشهير ع. م. ع

والله رأيبى حتى لو ما بتعمل اي حاجة برضو من المفترض نحن ما نجيب ناس من برا؛ لان الناس الخريت دي مننا وفينا برضو؛ نجيب ناس يصلحوا مننا لازم نجيب ناس مننا يقدموا المحاكمات.

افت الشهير ع. ا. ا

انا أفضل نشكل ناس من السودانيين نزيهين ونجيب ناس من برا معاهم عشان اكون شغل كله مع بعضه.  
اغ الشهير م. س

انا ما بثق في لجنة اديب للأسف، **ما بثق فيها وندمت ان مشيت ادليت باقوالي**؛ لأنني خايفة على اصحاب الشهيد وخايفة على كل الاولاد الجوا شهدوا.  
والدة الشهيد ص. ط

والله في الحقيقة لجنة فاشلة واحنا دايرين نعرف ملفات اولادنا زاتها وين؟ وين هي الملفات دي موجودة؟ بحاكموهم عبر الهواء ساي؟ هل موجودة هي ولا ما موجودة ونبيل اديب عمل لينا شنو؟ ما عمل اي حاجة سنتين ودي السنة الثالثة.  
والدة الشهيد ع. ا. ا

لجنة اديب انا اعتبرها لجنة فاشلة؛ بتسوف في القضايا، ما عملت لينا حاجة. انا بقترح تكون في لجنة دولية؛ عشان تتحقق العدالة.  
والدة الشهيد ف. ع. ن

هي لجنة، بس مكونة بطريقة بحس بها غير صحيحة او بتشوف ان هي ما صحيحة، دايماسكها الطرف السلطوي.  
اغ الشهيد ع. س

اديب ما عنده حاجة، ما عنده علاقة مع أسر الشهداء لا من قريب ولا من بعيد. همه الاول والاخير انه يمثل تمثيلية ما اكثر من كذا ولا أقل.  
والد الشهيد ع. م. ن

السيد رئيس الوزراء أول ما وصل يمكن ثاني يوم، زارنا نحنا كأسر شهداء في دارنا و اوعدنا انه سيكون لجنة خاصة بالشهداء، لم يستشيرنا ولم نعلم إلا وفوجئنا بتكوين لجنة اديب دون إخطارنا، ودي حقيقتنا يعني اخفاق كبير جدا؛ كوني انا اكون المظلوم يعينوا لي إنسان دون استشارتي ولا حتى اكون موجود فا دا إخفاق، عشان كدا من المبدأ احنا اصلا استنكرنا لجنة اديب وخير مثال استنكارنا كان في محله لحد الان سنتين لم يأتي بجديد بل وانه يطلب مزيد من الزمن حتى يستكشف.

والد الشهيد ع. ا

انا ما بثق فيها لانها زيها و زي اي لجان تانية.. ما تحقق اي شيء، اصلا فض الإعتصام كان واضح، القوات الكانت موجودة برضو واضحة وظاهرة ودا كله واضح وظاهر، ليه التعرقلات دي جاية؟ السبب واضح ان التعرقلات الجاية دي من الرؤساء.

افت الشهيد ح. ي

انا مع لجنة التحقيق الدولية او الإفريقية؛ لان لجنة اديب اخدت الزمن الكافي يعني مرور اكثر من عامين على قضية فض الإعتصام وما تظهر اي نتيجة؟!

والدة الشهيد م. ص

لجنة اديب ما عملت حاجة ولا حا تعمل حاجة كل ما يدوهم فترة هم بطلعوا تقارير مشينة وبتستخف بعقول الناس ، وما عندهم النية اصلا في تحقيق اي شيء من لجنتم دي، ف شايبة خيار ان الناس تكون لجان مستقلة خيار أفضل.

افت الشهيد ا. ع. ن

المفروض هم زانعم يكونوا ليهم لجنة ويسألوهم المماكلة دي حصلت لشنو والتأخير دا زاته حصل لشنو.

اغ الشهيد م. ع.

انا ما بعرف اديب جا من ياتو جهة، وهو ما شغال، ما محاسب ليه؟ فترته القاعد دي ما عمل لينا اي شيء. انا ما بثق في لجنة اديب وانا برفضه ونطالب بزول غيره اتعين بقرار من أسر الشهداء.

والدة الشهيد ا. م

والله راي كبعنا انه اول شي ما تطلع برة، اديب حاليا ما شايعة منه حاجة بالجد لانه هو الحقيقة واضحة اي الحاجات واضحة وهو في تاخر شديد منه وتماطل لكن اكيد في زي ما قلت ليك في سودانيين خبراء زي ما قلتني قادرين ان يحققه العدالة في البلد دي ف انا من راي يعني ما تطلع برة ممكن استعينه بسودانيين في وحدين مؤهلين خبراء

افت الشهيد ف.ع.ف

المحكمة المحلية او الوطنية افضل لي من البرا، على الأقل دي حاجة بتحفظ لي حقي وبتحفظ لي كرامتي

افغ الشهيد م.ع

صراحة لجنة اديب متماطلة يعني لان الفيديوهات وشهادة الشهود المشوا ليهم هو بنفسه قال ٣ الف شاهد تقريبا كذا والفيديوهات السلمت له والحاجات اوضحه هو قال احتمال تكون مفبركة ف هي لايفات كانت بتبث اثناء الفضى ف كيف زول بفبرك لايف انها كان كفيلة عالقل انك تقول مثلا لو انت خايف مثلا من القيادة بتاعت القوة قول ان القوة دي لابسة كذا وانا بدين القوة دي؛ ف هي ما بتحقق لينا الحاجة النحنا عايزنهما.

افت الشهيد ع.ع

هي لجنة ادت دور وحاولت توصل للحقائق وهي وصلت  
لحقائق فعلا، لكن في بعض من الحقائق هي بتخفيها  
لسلامة رقبتهها هي زاتها اللجنة ولتعاونها. المجلس السيادي  
الريموت المحرك البرامج؛ فا لجنة اديب زاتها عندها حدود ما  
بسمحوا ليها تتخفى الحدود دي.

والد الشهيد م.ع.





---

**إذا ما تم اعتراف واعتذار علني  
من قبل القوات النظامية لما  
ارتكبه من جرائم ومجازر  
فهل تتم المسامحة او العفو؟**

---

وضعنا دستورنا بشرك ان يقيم الأمر دا الدولة،  
تُشكل من الجيل دا واقول الجيل دا من ٤٠ سنة  
لعمري يوم؛ على الاطلاق ما يشاركوا فيها هذه  
الكهول ذات الفكر الضلالي المشاركة في كل  
الإجرام، يشكلوا دولتهم يمشوا بالنهضة اللي  
هم يروها بالمناسبة ٣٠ سنة دي ما كانت ساكت،  
٣٠ سنة عشان يخرج من صلب هذه ال ٣٠ سنة  
جيل إنسان ناضج إنسان واعى، تم ذلك بكون نحنا  
وصلنا بلغنا ا. وكل الشهداء بان امالكم وتطلعاتكم  
و فداكم تم. اما ما خلا ذلك بنزل مناظلي ونزل.  
والد الشهيد ا. ك

**جزء من مطالبنا ان يكون في اعتراف من القوات  
النظامية اللي قامت بالدور البشع ده، ده جزء  
من مطالبنا بعد ما يكون في اعتراف بعداك  
يعني كل شخص مخير، انا ما بعرف نفسياتي  
اللحظة بتاعت الاعتراف حتكون عاملة كيف لكن  
ايا كان، انا عندي قناعة تامة ان الشخص اللي  
هيعترف لي ده، إذا عملوا فيه مهمما عملوا ما  
حيعيد لي ولدي فبالتالي بتمنى ان اللحظة ديك  
ربنا يقدرني على المسامحة الكاملة.  
والدة الشهيد ع. س.**

Too late الاعتراف ما يكون بعد سنتين من  
الجُرم، لو كان الكلام دا بعد أول اسبوع او قلنا أول  
شهر من ارتكاب الجُرم قد نقبل ولكن اسي بس  
بيننا القضاء بيننا القصاص.

أسرة الشهيد م. ت. م

## **حسامح، المسامح كريم الغلط غلط وعرّف غلطه و جا اعتذر تسامح له؛ لان بدون مسامحة ما بنعيش.**

نحننا حسامح لكن على شرك احنا دايرين الأمان  
يكون متوفر في كل السودان مش في المدن.

ص. م. ع أسرة الشهيد ح. م. ع

والله انا بنضم عن نفسي، شخصيا انا والله  
العظيم القاتل لو جا امامي، انا لي شريكة اللي  
هي زوجتي امه بعد رأيها، انا رأيي اصلا حافاه  
بعفاه ما بفرق معاي والله بشيء، لو قتلوا هو  
زاته القاتل دا، لو قتلوه ما برد لي ولدي لو خلوه،  
انا بشكويه لله ولو في عفوا بعفاه بعد اشاور امه  
وتقبل بالحتة دي.

والد الشهيد م. ا. س

إذا كان ظهر الجيش وكلهم على أجهزة الإعلام  
عشان اقولوا الكلام دا (الاعتراف بالجرائم)،  
بعتبر فات الأوان لئنهم اخدوا فرصتهم الكافية  
لئنهم اظهروا واقولوا الحقيقة وهي الحقيقة  
اساسا اتقالت يعني "حدث ما حدث" كانت حقيقة  
واضحة، هي اتقالت لكن مافي اي تنفيذ للعدالة  
إذا كانت عدالة اجتماعية او العدالة الانتقالية فاما  
افتكر ان انا شخصيا ممكن ما اكون مسامحة.

مثلة رأسة الشهيد م. ص

انا شايفة إذا هم الناس الادوا الاوامر هم  
اعتذروا، والله يعني عفى الله عما سلف ما  
في النهاية هو بشر و جل من لا يخطئ.  
ممكن اكون في تسامح؛ إذا هم حاسين بالندم  
فعلا الناس الادوا الاوامر مش المنفذين للاوامر.

خالة الشهيد ن. س

انا مستحيل اعفي دم الشهيد ا. ك بأي سبب من  
الأسباب، القصاص ثم القصاص وحا اعيدها ثاني  
القصاص.

والدة الشهيد ا. ك

انا في رأيي الشخصي ما اظن اسامح.

اخت الشهيد ف. ع. ف

والله نحن كأسر شهداء إذا جونا وقالوا  
الكلام دا ما بنقبل؛ لان الناس ديل اساس  
العملية دي، حاجة ممنهجة مدبر لها؛  
يعني ما جات بالصدفة، لو كانت حصلت  
بالصدفة انحن بنقبلها لكن دا شغل ممنهج.

عم الشهيد ا. ت

بتعليمات منو قتلت؟ و العائد الرجع ليك شنو من مقابل القتل؟ انت اتقبلته بياتو سبب؟ بياتو دافع؟ لايد ان تكون انت واضح معاي للاخر عشان انا اتخذ قرار ان اعفيك او اعاقبك بالسجن ما اعدمك. مع العفو، بشرط حتى ولو اقرؤا، احنا دايرين ابعادهم تماما من مهامهم، يتركوا مجال ومساحة لناس تانيين بعد الاعتراف والاقرار والاعتذار احنا اصلا بنعفي.

والدة الشهيد ا. م. ا

انا بقول رأيي الشخصي، الاعتراف قيمة مهمة لكن مربوط بحاجتين لازم يتبعوا هذا الاعتراف، كشف الحقيقة لان الحقيقة عندها قيمة؛ كيف تمت هذه الجرائم دا مهم جدا، المسألة الثانية، الرغبة في إحداث إصلاحات مؤسسية في مؤسسات العدالة والقوات العسكرية كئمن لهذه الجرائم إذا تموا ذيل انا بكون عندي القدرة على العفو عن من قتل ابني.

والد الشهيد ع. س

العفو انا ما اعتقد انه مربوط بالاعتراف بس، يعني ما بتاع دعم سريع يجيك يقول معليش انا قتلت اخوك، او بتاع جهاز امن يقول معليش انا قتلت اخوك والموضوع انتهى كدا، لا؛ ما لم تكون في إصلاحات مؤسسية في كل المؤسسات بتاعت الدولة المؤسسة العادلة والعدلية العسكرية. ما لم يكون في إصلاحات، الاعترافات دي ما بتعني اي حاجة وحتى الاعتذار ما يعني حاجة.

اغ الشهيد م. ع. ح.

ما بنسامحهم لان المجرم دا حيضل طول عمره مجرم مهما طال ووصل السحاب، حيكررها لو عفيتو و لو ما عفيتو حيكررها. ما بعترفوا لانهم لحد الان ما واثقين في المدنية و في ان الحكومة حتبقى مدنية او الشعب السوداني دا حيكون السلطة لان ما معترفين بنا مازالوا هم ما معترفين بنا.

والدة الشهيد ع. ا. ا.

مافي مسامحة ما في مسامحة و ”دم قصاد الدم“ دي بالنسية لينا من المسلمات.

صديق الشهيد ص. ط

والله الإنسان بطبعه رحيم لكن لو جوا ووقفوا  
قدامنا قالو والله انحننا قتلنا اولادكم و عابزين  
نعمل تسوية، التسوية في المحكمة ما برا و اي  
إنسان عنده الحق يعبر عن رأيه ووجهة نظره. فا  
انا شخصيا غير القصاص ما عندي شيء. كل قضية  
بتكون قائمة بذاتها بعداك الخيارات زاتها متوزعة  
علي اولياء الدم. ففي الحالة دي ما لم انك تقدم  
للقضاء والقضاء يقول كلمته يدوك خيارات ثلاثة انه  
انت تعفو او ادوك الدية او القصاص، فا انا بشوف  
انه الحكاية ما بتكون مجتمعة، الحكاية بعد ما تصل  
القضاء اي أسرة تختار الحاجة اللي بتشوف هي  
انسب ليها في قضيتها.

اغ الشريد ع.م.ع



---

**موقفكم تجاه التعويضات  
المادية وما يعرف بالدية؟**

---

عمره التعويض المالي ما كان  
حل؛ المال ينتهي الإحساس  
بتاع الفقد ما ينتهي يعني انتو  
اتخيلو انا في اي لحظة بتذكر  
تفاصيل ولدي قدام عيني.  
والدة الشهيد ع.ك.

لا ابدأ، انا بأسم أسر الشهداء كلهم بكرر وبقول مافي أسرة شهيد حتساوم ولا حتتنازل بأي وضع مادي والبلد دي عشان تمشي القانون يجري مجراه.

والدة الشهيد ا. ا. س

التعويضات انا باعتبارها حق مشروع للأسر ودا حق على الدولة للأسر دي، المفروض اساسا اكون موجود. ممارسة القوانين وتطبيق القانون والعدالة، لازم تطبق العدالة مع التعويض. الدية حق مشروع برضو للأسرة يعني الزول لمن اقدم للمحاكمة او اجي للمحكمة الأسرة عندها الحق في العفو او قبول الدية او القصاص ودا ما حق شخص ثاني دا حق ولي الدم يعني انا اخو الشهيد ما من حقي اقول داير قصاص؛ انا بعد ما اصل المحكمة في النهاية حا اشاور امي لانها هي عندها الحق في الدم دا اكر مني ، اي انا بقيف معاها يعني هي لو قالت اعفي بعفي لو قالت دايرة الدم انا داير الدم.

اغ الشهيد و. ع. ر

الدية موجودة في الشريعة ولكن الدية دي بعد يكون مثلا القتل قتل شبيه بالخطأ او قتل خطأ ممكن انا اقبل الدية؛ باعتبار ان الزول دا ما كان عنده النية لانه يقتل الزول المات لي دا، لكن الجرائم الاسي تمت في عهد النظام البائد كلها جرائم مع سبق الإصرار والترصد لذلك لا نقبل الدية، الدم قصاد الدم.

عن أسرة الشهيد م. ت. م

في تعويضات جزء منها بتكون سمحة يعني لمن  
يعملوا حاجة بإسم الحي يخدم الحوليك بإسم  
الشهيد دي شوية بتخفف عنك.

أسرة الشهيد ع. م. ع

والله احنا اصلا التعويض دا ما دايرنه لكن دايرين  
بس تعيش يعني عيشة كويسة آمنة ومستقرة.  
بس تعيش يعني عيشة كويسة آمنة ومستقرة  
ابنائنا يرجعوا.

والدة الشهيد م. ح. ع.

والله كويس لو عملوا مستشفيات باسمائهم  
وعملوا مدارس باسمائهم كويس، يعني بتكون  
ذكريات من شهداء السودان.

والدة الشهيد م. ح

**نحن مشاكلنا ما مادية اننا مشاكلنا فقدنا  
جزء منا ابننا البعوضنا، ابني الكبير، الاصغر  
منه معاق، اصغر منه بت. انت شلت "نوارت  
فريقنا" حتعوضني بدله شنو؟ كان تسبح بخيالك،  
يعني أسرة الشهيد ع. ك دي تركيبتها. اننا  
فيينا نزعة جاهلية لسة إذا بشروك بالانثى بتضر  
وشد ان قالوك ولد بتعرضي، يعني ناس الجندر  
ما يهيجوا فيني لكن دي الحقيقة المترسخة  
فيينا. انت شلت نوارت البيت بتاعي حا تعوضني  
بدله شنو؟ انت تغري بعض ضعاف النفوس  
والضروف ورقة الحال ويمكن تقدر تأثر عليهم،  
يمكن عاطفة الأبوة والأمومة فيهم تغطي على  
ما تهدف له انت من رغبات في سبيل الإفلات  
من العقاب "الدم قصاصه الدم" هي ما "قصاده  
الدم"، "قصاصه الدم ما بنقبل الدية" دا شعار من  
شعارات الثورة.**

والد الشهيد ع. ك

مافي قروش في الدنيا دي، ماف ماديات في  
الدنيا دي، تقدر تعوض على روح.

اغ الشهيد ع. ص

## دايرين التساوي والعدالة الماتوا من اجلها اولادنا دايرين الحرية والسلام والعدالة ،

نحننا إذا لامسنا في عدالة والله الراح راح وما غالين لربهم، احنا والله ممكن نسامح لكن شيء يعوضنا عن اولادنا مافي، مافي والله لا مال، لا غفور، لا غيره.

والد الشهيد م.ع.س

يعني شنو قبلت تعويض؟ ما بتحل شي والله، يعني لو اتحل زاته بكون من داخل قلبكم كدا محروقين يعني كدا بعنوا ولدكم. دا شهيد من المفترض اي زول اعرفه في السودان دا، اي زول يعرف الزول دا شهيد اتوفى بتاريخ كدا، ومات وين، وقتلوه وين.

اغ الشهيد م.ع

## والله لان ديل اخوانا ما بنقبل الدية، ممكن يعملوا لينا بس تعويض رمزي ؛ مدارس

ومستشفيات باسماء الشهداء، لكن دية ما بنقبل خالص.

افت الشهيد م.ا.ف

التعويض في شنو يعني؟ يعني ادوك عمارة ولا عريية ولا كدا، ما هو مال الدنيا اصلا لزوال، والتعويضات دي ما حا تعمل اي حاجة. اصلا الناس متذكرة والشعب السوداني اصلا ما حا يخون القضية وما حا يخون الشهداء، الناس ما حا تنسى ولا الجيل الهسي ولا الجيل الجاي ولا البعده ما حا ينسوا ما حا ينسوا.

أسرة الشهيد م.ع.ا.ع.

الدم قصاد الدم ما بنقبل الدية. التعويضات المادية  
عموما بتشيل اكثر ما بتدي اما الشايفها ممكن  
هي التعويضات الرمزية.

اسرة الشهيد ص.د. ط

مافي زول بياخذ قرش في جناه او تعويض في  
جناه لا ، احنا ما دايرين منهم قرش؛ هم طلعوا  
برا الشارع دا على اساس دايرين قروش؟! طلعوا  
يحققوا للناس مطالب؛ احنا دايرين القصاص في  
حق اولادنا ذيل ودايرين السودان امشي قدام.

والدة الشهيد ع. ا. ع

انا غايتو زولي ما برضى فيه، ادوني تعويض كدا  
بعث القضية، بعث دمه.

اغت الشهيد الشهيد ن. س

ما حتعوض اي حاجة؛ انا ابوي اتوفى، حتعوضني  
بقروش؟! طبعا اكيده لا، لازم اعرف القتل منو؟  
وقتلوا لشنو؟ وكان هدفكم شنو؟

ابنة الشهيد ع. م. ع

في أسر فقيرة جدا ما عندها ما تملك قوت يوم،  
ذيل ما بنقدر نحرهم من انهم ينالوا تعويضات  
سواء كانت مادية او خلافة. **فا لكل أسرة الحق  
في المطالبة بالقصاص او مطالبة بالدية او  
بالمسامحة.** التعويض الرمزي دا حق مشروع؛  
يعني ما مسألة منحة من جهة؛ لكن حق مشروع  
للشهداء، ان تسمى مستشفيات، شوارع،  
مؤسسات باسمائهم تخليد لذكراهم.

والد الشهيد ع. ا. ع.

اول حاجة حق الشهيد دا بجي إذا في الدنيا او  
في الاخرة ، واكيد محفوظ عند ربنا. لكن نقبل  
تعويضات دي صعبة. ما بتفق معاها نعائى الدم  
قصاص الدم. حاجة كويسة ان اسموا شارع باسم  
شهيد او مدرسة؛ يعني الأجيال الجاية تعرف مثلا  
انه كان زمان في ثورة في شهداء وكدا.

اغت الشهيد ف. ع. ف

بتقدري تقدري لي دم "ق". بكم؟ ق. ولذي الكبير احلامي، احلامه هو، احلام اخواته، مسئوليته، بناء الوطن، المواطنة الكريمة في بلده حياته تمتد يتم ثمين، سبعين سنة، حقه في الحياة، محبتي له انا جواي، ولذي الطلعت انا من بطني عشان يعيش، عشان اشوفه قدامي، واي حاجة سمحة يلقاها؟ ما اعتقد في أسرة شهيد حتقبل التعويض المادي. الحق الانا بطالب به طلعا الاولاد ديل من اجل الحرية والسلام والعدالة، نحنا دايرين الحرية والسلام والعدالة ما بهمني إذا في شارع باسمه او ماف بالنسبة لي دا ما شيء مهم لكن المهم انه الحرية والسلام والعدالة اتحققوا.

والدة الشهيد ه. ع

والله لو ادونا تعويض، انا ما حا تجيب لي دم بتي، ما حا تجيب لي دم بتي. ام الشهيذة ه. ه. ا

والله انا تماما ضد الكلام دا؛ لان اديهم قروش دا استفزاز في حد ذاته؛ ادوهم عدالة، ادوهم حق في الوطن، ادوهم قيمة، ادوهم اهمية، اصلحوا حال البلد، خلي الكل يقول من وراء دم اولادكم بلدنا اتصلحت. كمسلمين الدية حق اولياء الدم. العايز يشيل الدية الناس خصوصيات ما بنقول له بعت دم ولدك، ولا ادوك قروش، وشلت قروش مقابل دم ولدك.

والدة الشهيد ا. م. ا

ربنا اداهم الحق في القصاص او العفو او الدية، والدية حق لولي دم إذا هو رضا ان يجير الضرر بتلعه بمال دا حقه، لكن هل بتنتهي القضية؟ ماف زول بيع دم ولدو. اولادنا ديل خرجوا من اجل قضية وطن، يبقى طبيعي ما نتنازل إلا لتحقيق اهدافهم اللي هي في الحرية والسلام والعدالة. انا لو ادوني مال الدنيا، مال الدنيا دا كله ادوني له ما بعوضني عن ع.

زوجة الشهيد ع. ا. ع. م

إذا تم تحقيق دولة عدالة في السودان ودولة مؤسسات بتكفيني مسألة حفظ الذكرى لولدي، انا بفتكر دا ثمن كافي بدون مقابل مادي، لكن لو في ناس قبلوا مقابل مادي انا بفتكر من حقهم، لأن كل زول بشوف العدالة و الإنصاف من زاوية بالضرورة مختلفة من الآخر، ما من حق زول يلوم زول على نظرتة للإنصاف والعدالة؛ دي مسألة بتخص الناس وبترجع للمفاهيم الثقافية والإجتماعية البتختلف من مجتمع لمجتمع ومن إنسان لإنسان.

والد الشهيد ع. س

